

季漢書



季漢書



季漢書卷十三

諸暨章陶裁良氏纂

邑後學

周應

模全校

諸葛亮列傳

丞相亮姓諸葛字孔明瑯琊陽都人司隸校尉豐之後也父珪字君貢官泰山郡丞亮早孤從父元爲豫章太守元將亮及亮弟均之官會朝廷以朱皓代元元素與荊州牧劉表有舊往依之時王室微曹操擅國將代之元卒亮遂家于南陽鄧縣之隆中身長八尺躬耕隴畝好爲梁父吟每自比於管仲樂毅時人莫之許也惟博陵崔州平徐庶特信之昭烈屯新野訪世事於司馬徽徽曰儒生俗士豈識時務識時務者在乎俊傑此間自有伏龍鳳雛昭烈問

爲誰曰諸葛孔明龐士元也徐庶見昭烈昭烈器之庶謂
昭烈曰諸葛孔明者卧龍也將軍豈願見之乎昭烈曰君
與俱來庶曰此人可就見不可屈致也將軍宜枉駕顧之
昭烈遂詣亮凡三往乃見因屏人曰漢室傾頽姦臣竊命
主上蒙塵孤不度德量力欲信大義於天下而智術淺短
遂用猖獗至于今日然志猶未已君謂計將安出亮答曰
自董卓已來豪傑並起跨州連郡者不可勝數曹操比於
袁紹則名微而衆寡然操遂能克紹以弱爲强者非惟天
時抑亦人謀也今操已擁百萬之衆挾天子以令諸侯此
誠不可與爭鋒孫權據有江東已歷三世國險而民附賢
能爲之用此可以爲援而不可圖也荊州北據漢沔利盡

南海東連吳會西通巴蜀此用武之國而其主不能守此
殆天所以資將軍將軍豈有意乎益州險塞沃野千里天
府之土高祖因之以成帝業劉璋闇弱張魯在北民殷國
富而不知存恤智能之士思得明君將軍既帝室之胄信
義著於四海總攬英雄思賢如渴若跨有荆益保其巖阻
西和諸戎南撫夷越外結好孫權內脩政理天下有變則
命一上將將荊州之軍以向宛洛將軍身率益州之衆以
出秦川百姓孰敢不箪食壺漿以迎將軍者乎審如是則
霸業可成漢室可興矣昭烈曰善與亮情好日密關羽張
飛等不悅昭烈解之曰孤之有孔明若魚之有水也願諸
君勿復言羽飛乃止建安十三年曹操攻劉表會表卒子

琮降操昭烈在樊聞之率衆南行亮與徐庶並從爲操所
追敗陷庶母庶辭昭烈而指其心曰本欲與將軍共圖王
霸之業者以此方寸之地也今已失老母方寸亂矣無益
於事請從此別遂詣操昭烈奔夏口亮曰事急矣請奉命
求救於孫將軍時權擁軍柴桑亮往說曰海內大亂將軍
起兵據有江東劉豫州亦收衆漢南與曹操並爭天下今
操芟夷大難略已平矣遂破荊州威震四海英雄無所用
武故豫州遁逃至此將軍量力而處之若能以吳越之衆
與操抗衡不如早與之絕若不能何不北面事之事急而
不斷禍至無日矣權曰苟如君言劉豫州何不遂事之乎
亮曰田橫齊之壯士耳猶守義不辱况豫州王室之胄英

才蓋世衆士仰慕若水之歸海若事之不濟此乃天也安能復爲之下乎權勃然曰吾不能舉全吳之地十萬之衆受制於人吾計決矣非豫州莫可以當曹操者然豫州新敗之後安能抗此難乎亮曰豫州軍雖敗於長阪今戰士還者及關羽水軍精甲萬人劉琦合江夏戰士亦不下萬人曹操之衆遠來疲弊聞追豫州輕騎一日一夜行三百餘里此所謂強弩之末勢不能穿魯縞者也故兵法忌之曰必蹶上將軍且北方之人不習水戰又荊州之民附操者偪兵勢耳非心服也今將軍誠能命猛將統兵數萬與豫州協規同力破操軍必矣荆吳之勢鼎足之形成敗之機在今日也權大悅卽遣周瑜程普魯肅等率水軍三萬

詣昭烈并力拒操敗之於赤壁操引還昭烈遂定荊州以
亮爲軍師中郎將督零陵桂陽長沙三郡治臨蒸十六年
益州牧劉璋遣使迎昭烈擊張魯亮與關羽鎮荊州昭烈
自葭萌還攻璋亮率張飛趙雲等軍沂江分定郡縣與昭
烈共圍璋於成都璋降昭烈遂定益州拜軍師將軍署左
將軍府事二十四年關羽督荊州諸軍伐曹操克襄陽而
孫權襲南郡陷之自此東師不復出二十五年曹丕篡漢
自立羣下勸昭烈卽位紹祀昭烈未許亮進言曰昔吳漢
耿弇等勸世祖卽帝位世祖辭讓前後數四耿純進曰天
下英雄喁喁冀有所望如不從議者士大夫各歸求主無
爲從公也世祖感純言深至遂然諾之今曹氏篡漢天下

無主大王劉氏苗族紹世而起今卽帝乃其宜也士大夫
隨大王久勤苦亦欲望尺寸之功如純言耳章武元年夏
四月帝乃卽位拜亮丞相錄尚書事假節策曰朕遭家不
造奉承大統兢兢業業不敢康寧思靖百姓懼未能綏於
戲丞相其悉朕意輔朕之闕助宣重光以照明天下君其
勗哉張飛卒亮復領司隸校尉三年帝疾篤召亮至永安
宮屬曰君才十倍曹丕必能安國終定大事若嗣子可輔
輔之如其不才君可自取亮泣曰臣敢竭股肱之力効忠
貞之節繼之以死帝又爲詔勅太子曰汝與丞相從事事
之如父夏四月帝崩後帝卽位封武鄉侯開府治事頃之
又領益州牧亮乃約官職修法制下教曰夫參署者集衆

思廣忠益也若遠小嫌難相違覆曠闕損矣違覆而得中
猶棄敝蹻而獲珠玉然人心苦不能盡惟徐元直處茲不
惑又董幼宰參署七年事有不至至于十反來相啟告苟
能慕元直之十一幼宰之勤渠有忠於國則亮可少過矣
又曰昔交州平屢聞得失後交元直勤見啟誨幼宰每言
則盡偉度數有諫正雖資性鄙暗不能悉納然與此四子
終始好合亦足以明其不疑於直言也偉度者主簿胡濟
也初昭烈之崩也吳遣其臣馮熙來弔亮使鄧芝報之且
修好益州郡耆帥雍闓等殺太守叛附吳使其郡人孟獲
誘扇越嶲牂牁諸夷作亂三年未靖建興三年亮率軍南
征雍闓詔賜亮金鈇鉞一具曲蓋一前後羽葆鼓吹各一

部虎賁六十人至南中所在戰克由越巂入斬雍闓等孟
獲素爲夷漢所服收餘衆拒亮亮募生致之使觀於營陣
間問曰此軍何如獲對曰向者不知虛實故敗今蒙賜觀
營陣若祇如此卽定易勝耳亮笑縱使更戰七縱七擒之
而亮猶遣獲獲止不去曰公天威也南人不復反矣遂至
滇池益州永昌牂牁越巂四郡皆平卽其渠率而用之或
以諫亮亮曰若留外人則當留兵兵留則無所食一不易
也加夷新傷破父兄死喪留外人而無兵者必成禍患二
不易也又夷累有廢殺之罪自嫌釁重若留外人終不相
信三不易也今欲使不留兵不運糧而綱紀粗定夷漢粗
安故耳師還之次年曹丕卒其子叡自立亮將伐之五年

率諸軍北駐漢中臨發上疏曰先帝創業未半而中道崩殂今天下三分益州疲弊此誠危急存亡之秋也然侍衛之臣不懈於內忠志之士忘身於外者蓋追先帝之殊遇欲報之於陛下也誠宜開張聖聽以光先帝遺德恢宏志士之氣不宜妄自菲薄引喻失義以塞忠諫之路也宮中府中俱爲一體陟罰臧否不宜異同若有作姦犯科及爲忠善者宜付有司論其刑賞以昭陛下平明之理不宜偏私使內外異法也侍中侍郎郭攸之費禕董允等此皆良實志慮忠純是以先帝簡拔以遺陛下愚以爲宮中之事無大小悉以咨之然後施行必能裨補闕漏有所廣益將軍向寵性行淑均曉暢軍事試用於昔日先帝稱之曰

能是以衆議舉寵爲督愚以爲營中之事悉以咨之必能使行陣和穆優劣得所親賢臣遠小人此先漢所以興隆也親小人遠賢臣此後漢所以傾頽也先帝在時每與臣論此事未嘗不歎息痛恨於桓靈也侍中尚書長史參軍此悉貞亮死節之臣也願陛下親之信之則漢室之隆可計日而待也臣本布衣躬耕南陽苟全性命於亂世不求聞達於諸侯先帝不以臣卑鄙猥自枉屈三顧臣於草廬之中諮臣以當世之事由是感激遂許先帝以驅馳後值傾覆受任於敗軍之際奉命于危難之間爾來二十有一年矣先帝知臣謹慎故臨崩寄臣以大事也受命以來夙夜憂歎恐託付不效以傷先帝之明故五月渡瀘深入不

毛今南方已定兵甲已足當獎率三軍北定中原庶竭駑
鈍攘除姦凶興復漢室還於舊都此臣所以報先帝而忠
陛下之職分也至於斟酌損益進盡忠言則攸之禕允之
任也願陛下託臣以討賊興復之效不效則治臣之罪以
告先帝之靈若無興德之言則責攸之禕允等之慢以彰
其咎陛下亦宜自謀以諮諏善道察納雅言深追先帝遺
詔臣不勝受恩感激今當遠離臨表涕零不知所言遂行
屯於沔北陽平石馬六年春伐魏揚聲由斜谷道取郿使
趙雲鄧芝爲疑軍據箕谷僞大將軍曹真率衆逆拒亮親
督諸軍攻祁山戎陣整齊號令明肅天水南安安定皆來
歸關中響震魏曹叅西至長安遣僞右將軍張郃率步騎

五萬逆拒亮使參軍馬謖督諸軍與郃戰於街亭謖違亮節度遂大敗初亮之出也圍天水拔冀城獲姜維至是乃拔維及西縣千餘家還漢中戮謖上疏曰臣以弱才叨竊非據親秉旄鉞以厲三軍不能訓章明法臨事而懼至有街亭違命之罪箕谷不戒之失咎皆在臣受任無方臣明不知人恤事多闇春秋責帥臣職是當請自貶三等以督厥咎詔以亮爲右將軍行丞相事所總統如前或勸亮更發兵者亮曰大軍在祁山箕谷皆多於賊而不能破爲賊所破者則此病不在兵少也在一人耳今欲減兵省將明罰思過校變通之道於將來若不能然者雖兵多何益自今已後諸有忠慮於國但勤攻吾之闕則事可定賊可死

功可躋足而待矣於是考微勞甄壯烈引咎責躬布所失於天下厲兵講武以爲後圖民忘其敗矣冬十一月亮聞孫權破曹休魏兵東下關中虛弱上言曰先帝慮漢賊不兩立王業不偏安故託臣以討賊也以先帝之明量臣之才故知臣伐賊才弱敵強也然不伐賊王業亦亡惟坐而待亡孰與伐之是故託臣而弗疑也臣受命之日寢不安席食不甘味思惟北征宜先入南故五月渡瀘深入不毛并日而食臣非不自惜也顧王業不可偏全於蜀都故冒危難以奉先帝之遺意也而議者謂爲非計今賊適疲於西又務於東兵法乘勞此進趨之時也謹陳其事如左高帝明並日月謀臣淵深然涉險被創危然後安今陛下未

及高帝謀臣不如良平而欲以長計取勝坐定天下此臣之未解一也劉繇王朗各據州郡論安言計動引聖人羣疑滿腹衆難塞胷今歲不戰明年不征使孫策坐大遂并江東此臣之未解二也曹操智計殊絕於人其用兵也髣髴孫吳然困於南陽險於烏巢危於祁連偏於黎陽幾敗北山殆死潼關然後僞定一時耳况臣才弱而欲以不危而定之此臣之未解三也曹操五攻昌霸不下四越巢湖不成任用李服而李服圖之委任夏侯而夏侯敗亡先帝每稱操爲能猶有此失况臣驚下何能必勝此臣之未解四也自臣到漢中中間期年耳然喪趙雲陽羣馬玉閭芝丁立白壽劉郃鄧銅等及曲長屯將七十餘人突將無前